

de ce grand Homme, vissent vn petit brin des grandes recompenses dont il iouit dedans les cieux. Sa mort auoit arresté le fecours qu'il nous donne: Mais i'apprens que quelques personnes de merite n'ont pas voulu que ce grand ouurage cessast, fortifiens nos bras qui s'alloient affoiblir par le decés de ceux qui meritent de porter le nom de vrais Peres des Chrestiens Sauuages.

Monfieur le Marquis de Gamache defunct, a merité le premier, de porter ce tiltre; car il a ouuert la premiere porte aux grandes Missions que nous auons entreprifes en ces derniers confins du Monde. Son fils s'estant donné à nostre Compagnie, finit ses iours l'an passé, avec la couronne d'vne riche perfeueran[c]e en la vertu; ils voient maintenant tous deux, combien fainctement & vtilement ces grandes liberalités sont employées, & comme vne belle action faite dans les temps, fructifie pour l'Eternité.

On m'a fait voir vne deuotion, dont ie ne doute nullement que le Sainct Esprit n'en soit l'autheur, la Charité est industrieuse; [206] vn homme de merite & de condition, veut prendre le foin d'vne famille de Sauuages, il destine vne centaine d'escus pour luy bastir vne petite maison; il veut qu'on luy escriue le nombre des personnes qui la composent, & comme ils s'appellent: Il demande ce qu'ils auront de besoin pour s'establir, la premiere année, & quel ordre il faut garder pour la faire subsister: Cette inuention ne vient point d'Archimede, mais d'vn plus grand esprit. Voila iustement le moien de donner à Iesus-Christ tous les descendans de cette famille, & *nati natorum, & qui nascentur ab illis*. Tous les enfans de leurs enfans, leurs neveux, & leurs arriere-neveux